

(Ref: Taite 25).

E to. e te ra! Hohoro te ngaro atu,
Kei whai atu hoki taku hoa i a koe.
Engari ano koe he ngaro ka hoki mai;
Tena ko taku ipo he ngaro ka oti atu,
Ka waiho au i konei karangi noa ai.
Kati nei koange he ngonginga huri atu.
Me ngongi aronui, kia kite te marea
I oku mapara e mau ana i aronui,
E mau ana i rua ngutu.
E pai ana ano mei tere wawe ko au
Te takapau a te tua ki te papa tiraha.
Kia kite ai koe i aku kapara puni
I pepehatia ai e aku kaumatua,
I tohea ai au kia oti hei koha
Kia koe, e te tau, ina mahue iho
I taku tinana nei, mei pono ki tera.
No to wawenga nei, haha kau atu ana.
Mei uru no runga e taea te motumotu,
Hei whakawhiwhinga atu ki to ringa, e te tau.
He aha te huanga i waiho iho ai,
Hei pakinga hau, hei whitinga ma te ra,
Hei tirohanga mata ma te hanga ware nei?
Ka pa ia nei ko te toka i Ahuru,
Mana e parahu o miringa rau nei,
Ka ponita noa ahau, ka korokeke te moe, e.

193.—HE TANGI MO TE AOTUROA,

Na Te Rangihinganui.

Na Te Taite Te Tomo nga kupu, nga whakamarama.

He tamahine a Te Aoturoa na Te Rangihinganui, he kuia no
Atanatiu.

(Ref.: Taite 27).

E whiti, e te ra!
Ka pai hoki koe,
Ki te whakaoho mai;
Na te mea ia ra
Ka nenewha ki te moe.
Te hirenga a te ra
Korowhiti tonu ake
Taku manawa i roto,
Oho marire ana,
Ata tau marire.
He hanga pai noa iho,
Mei rite tahi mai
Te hanga nei a taringa
Te kokopa ake
Kia rongu a tinana.
Ina hoki te he
He tuhanga riri kore.